

## *Prpratno pismo/Molba za posao*

Pored biografije, prpratno pismo je najvažniji prezentacijski alat i predstavlja idealnu priliku da istaknete svoje sposobnosti. Cilj prpratnog pisma je da pojasnite bitne podatke iz biografije. Osim toga, poslodavac iz prpratnog pisma treba da izvuče zaključak o tome zašto se obraćate njemu, koju radnu poziciju očekujete i zašto se smatrate odgovarajućom osobom za taj posao. Idealno prpratno pismo ne bi trebalo da sadrži više od četiri paragrafa.

### **Struktura prpratnog pisma:**

Lični podaci;  
Ime i prezime;  
Kontakt adresa;  
Kontakt telefon (fiksni/mobilni);  
E-mail adresa.

Mjesto i datum pisanja

Podaci o organizaciji/preduzeću  
Naziv organizacije/preduzeća;  
Adresa;  
Kontakt osoba.

**Predmet** (prijava za radno mjesto): naziv pozicije radnog mjesta na koje se prijavljujete;

Pismo uvijek započnite: „Poštovani“, „Poštovana“

#### Prvi paragraf

Ako je konkurs javno objavljen, navedite za koje radno mjesto (posao) konkurišete i kako ste saznali za spomenuti konkurs. Međutim, ukoliko samoinicijativno konkurišete, objasnite zašto ste se odlučili na taj korak.

#### Drugi paragraf

Navedite svoje kvalifikacije, dosadašnje radno iskustvo, znanja, vještine, osobine koje su u vezi sa radnim mjestom za koje konkurišete i pokažite kako u potpunosti odgovarate zahtjevima tog radnog mjesta.

#### Treći paragraf

Istaknite svoje učešće u programima/projektima stručnog osposobljavanja i obuke, interesovanje i entuzijizam, kao i želju da se dokažete u oblasti za koju konkurišete.

#### Četvrti paragraf

Naglasite svoju spremnost za razgovor sa poslodavcem.

Pismo završite sa:

„Srdačan pozdrav“, „S poštovanjem“, Unaprijed zahvalan/a,

Ime i prezime:

---

Prilozi:

Navedite šta prilažete od dokumenata

Primjeri prpratnog pisma:

**Primjer 1.** – pismo prijave po oglasu /molba za posao

Jasmin Blogić  
Miramarska cesta 105  
77 000 Bihać  
Tel: 037 613 506

Crvena plastika d.o.o.  
G-đa Amra Zonić  
Duga obala 35  
77 000 Bihać

**Predmet:** Prijava na konkurs

Bihać, 10.01.2011.

Poštovana g-đo Zonić,

Ovim putem se prijavljujem na konkurs za mašinskog operatera u noćnoj smjeni, koji je objavljen u „Večernjim novinama“ 07.01.2011. godine. Kao što možete vidjeti iz moje biografije, koja je u prilogu ovog pisma, radio sam deset godina u proizvodnoj industriji.

U našim poslovnicaama morali smo da izvršimo velike narudžbe na vrijeme da bismo ih odvezli u tržne centre, kako bi za vrijeme vikenda i prazničnih odmora bile spremne i opskrbljene, zbog čega sam navikao da radim brzo, pod pritiskom, a i prekovremeno po potrebi.

U EFS d.o.o. sam radio noćnu smjenu bez nadzornika pune tri godine, dok firma nije angažovala agenciju za pružanje usluga obezbjeđenja, a u prilogu je i pismo preporuke od rukovodioca tehničke službe, kome sam direktno bio odgovoran za svoj rad.

Iskreno se nadam Vašem pozivu na razgovor za posao.

S poštovanjem,  
Jasmin Blogić

Prilozi zahtijevani po konkursu:

- \* Biografija
- \* Svjedočanstvo o završenoj školi
- \* Preporuka rukovodioca tehničke službe u EFS d.o.o.

**Primjer 2.** – pismo prijave po oglasu /molba za posao

Zerina Terzić  
Titova bb 75 000 Tuzla  
Telefon: 035/987 654  
e-mail: dinabasic@yahoo.com

Turistička agencija „Panorama“  
n/p: Direktor  
Kulina bana bb 71 000 Sarajevo

Tuzla, 07.01.2011.

**Predmet:** Molba po Vašem oglasu od 05.01.2011.

Poštovani gospodine Nikić, Javljam Vam se po Vašem oglasu, objavljenom dana 05.01.2011., na web stranici [www.panorama.ba](http://www.panorama.ba), za radno mjesto stručnog saradnika u turističkoj agenciji. Budući da zadovoljavam uslove konkursa, a i objavljeni bi posao rado obavljala, dozvolite da Vam se kratko predstavim.

Po zanimanju sam stručni specijalist turističkog menadžmenta. Nakon završenog školovanja radila sam pet godina kao turistički savjetnik, u jednoj od najvećih turističkih agencija u regiji. Na poslovima koje sam obavljala, često sam se suočavala sa raznim izazovima, ali i problemima koje sam uspješno rješavala. Tako sam npr. bila podrška timu koji sam vodila i u kratkom roku rješavala reklamacije i dogovarala zamjenske aranžmane, dizajnirala ponude i promotivni materijal. U to vrijeme sam proputovala nekoliko evropskih i brojne destinacije u Bosni i Hercegovini, Hrvatskoj i Crnoj Gori. Cijelo vrijeme sam unapređivala znanje važno u domenu turističkog menadžmenta, kao i svoje znanje jezika, pa tako aktivno govorim engleski, njemački i talijanski.

Obzirom da svaki čovjek želi povremene promjene u životu i ja se želim zaposliti u agenciji koja svaki dana doživljava sve veću ekspanziju kao što je Vaša, jer vjerujem da bih u njoj mogla bolje upotrijebiti svoja znanja.

Više o sebi i svojim iskustvima ću Vam sa zadovoljstvom prezentirati na razgovoru za posao, ukoliko mi se ukaže prilika. Nadam se našem skorom susretu i radujem se mogućnosti zapošljavanja u Vašoj cijenjenoj agenciji. S pozdravom i poštovanjem, Zerina Terzić

Zerina Terzić

Prilog: Dokumentacija zahtijevana po konkursu - CV  
- Kopija diplome o završenom studiju  
- Preporuke

**Primjer 3. – pismo prijave /molba za posao bez oglasa**

Damir Topalović  
Ive Andrića 59  
76 000 Brčko  
Telefon: +387 49 123 456  
Mobitel: + 387 65 222 222  
e-mail: [topalovicdamir@yahoo.com](mailto:topalovicdamir@yahoo.com)

„Wood processing“ d.o.o.  
Duga obala 29.  
76 000 Brčko  
n/p: Direktor marketinga i  
ljudskih resursa

Brčko, 27.10. 2010.

**Predmet:** Molba za posao

Poštovani gospodine Garić, Cijeneći izuzetan pozitivan imidž Vašeg preduzeća, kao dijela uspješne multinacionalne kompanije, koja djeluje na našem području i u uvjerenju da u „Wood processing“ d.o.o. uvijek postoji potreba za dobrim radnicima, dozvolite da Vam se kratko predstavim.

Po zanimanju sam stolarski tehničar, iz Brčkog. Školu sam završio u maju 2010., odličnim uspjehom. Drvena industrija je oblast koja me uvijek zanimala i upravo je to i odredilo moje opredjeljenje da upišem srednju stolarsko-tehničku školu. Pored redovnog školovanja koristio sam praktičnu nastavu, proučavao stručnu literaturu i stupio u kontakt sa brojnim stolarskim radionicama da razvijem dodatne vještine u oblasti dizajna proizvoda od drveta.

Poznajem sve vrste drveta i njihova obilježja, kao i postupke obrade istog. Imam smisla za oblikovanje i izradu drvenih proizvoda i namještaja. Poznajem obavljanje svih faza izrade namještaja, od pripreme plana, razreza, oblikovanja, sastavljanja, pa do brušenja, lakiranja i montiranja. Kao aktivni tražitelj posla željan sam izazova, težim novim znanjima i vještinama, koja brzo usvajam i smatram da svojim odnosom i odgovornošću prema radu mogu zadovoljiti i najzahtjevnijeg poslodavca. Pošto je Vaše preduzeće poznato po izuzetnim rezultatima i inovacijama u drvno-prerađivačkoj industriji, kao i tome da Vam mnogo znači obrazovanje kadrova, bilo bi mi velika čast i zadovoljstvo ako bih postao članom Vašeg kolektiva. U iskrenoj nadi da ćete mi omogućiti razgovor na kojem bih Vam se mogao detaljnije predstaviti i time povećati svoje šanse za moguće zapošljavanje u Vašem cijenjenom preduzeću, želim Vam puno poslovnih uspjeha. S poštovanjem,

Damir Topalović

Prilozi:

- dokaz o stručnoj spremi
- biografija
- slike mojih proizvoda
- preporuke